

太

函

集

太函集卷之九十四

新都汪道昆伯玉著

䟽四首

查叅軍職官員䟽

題臣將閱視遼東適值彼中多警先行撫鎮會議
分伍區而就閱之首寧前次錦義次廣寧次遼
陽次開原臣于今年三月二十九日錦義閱操
據本部郎中左熙密雲兵備副使王一鶚會呈
將查過叅將郭承恩所屬廣寧中屯等衛操射
不到官千戶孫彪等六員軍人王大玉等三名

重名軍人田文舉等三十七名開呈到臣批仰
分巡遼海東寧道查問叅報隨據本道僉事賀
溱呈依蒙查審將臨操不到軍人王大玉等三
名取供具招及查義州衛千戶孫彪張印百戶
王元孝廣寧後屯衛百戶孫得祿廣寧中屯衛
百戶張崇武崔宗武六員俱各臨閱畏避操射
廣寧後屯衛武舉所鎮撫卓天衢承管造冊將
左哨軍人田文舉等三十七名重複誤造選鋒
項下叅將郭承恩未行檢查一併招叅到臣隨
批王大玉等依擬決發著伍孫彪等聽候類叅

提問郭承恩姑免叅提行令策勵供職實收繳
本年四月初七日臣會同巡撫遼陽閱操該臣
查據副總兵楊騰造送所屬營衛官軍聽閱射
冊于內都司陳言蘇承勲田永無名及查各衛
官止開二十九員在冊聽候閱射餘俱未造隨
問造冊中軍張棟訴稱陳言等囑令勿造當喚
陳言等面詰其故皆以疾辭查得在內則都司
進

表入京本部例當考閱在外則撫按巡歷都司例
應下操况遼陽最爲重邊而閱視奉有專

勅今都司陳言等非惟凌蔑體統明係故違

制書各衛官避閔漏報數多均屬可駭除將中軍張棟當場照依軍法紉打陳言等行令聽叅牌仰分守道先將都司首領官提問招詳仍將營衛官員應聽閔視者通行查明併報隨據遼陽分守道副使兼叅議李鶚呈依蒙查問隨將該司經歷張庭桂提問具招并將都司陳言蘇承勲田永副總兵楊騰中軍張棟一併招叅到臣隨批依擬張庭桂贖完復職副總兵楊騰姑令策勵供職陳言等聽叅外又據該道呈蒙臣面諭

各營衛官查照冊數漏報猶多依蒙行據通判
喬梁查得各衛官員除陞任在邊守堡調操公
差患病等項及見在報射外先蒙行查各衛掌
印官孫一本石汝器康世雍王志學宋繼殷自
在州知州賀國定止將定遼左衛指揮李遇時
王嘉柱李世武王邇王國泰白宗武劉世臣閻
顧善周三接孫迪孫尚仁王承德魏志善張問
政衛鎮撫王國卿于大爵張臣千戶陳時政李
梓洪進王承祖王三重百戶王世爵方仲義張
繼武林大武張應武宋可濟劉世勲孫尚忠徐

朝勲周守節袁文魁所鎮撫史尚忠武舉所鎮
撫吳仕良定遼中衛都指揮康國孫光裕指揮
李平陽吳汝翼徐登瀛胡順忠常思忠裴承祖
李可愛鄭蘭蔣世臣楊仲仁陳其蘊朱來賓衛
鎮撫完詔千戶馬世臣徐國相達繼宋劉世忠
浦澤劉世文師仲仁武舉所鎮撫李世珍康元
吉百戶高承宗陳一言白登瀛吳卿聶宗文楊
世勲尤添祥王仲魁王勲劉朝奉陳守道曹文
光皮玉王大章羅爲卿董承武王子京李臣定
遼前衛指揮掌印康世雍管屯馬騰遠管局捕

周體元都指揮萬邦憲指揮張榮顯吳紹勲馬
世魁李孝孫承詔鄔希堯王承恩劉國臣許國
忠千戶仙汝齡朱朝用李儒白鶴盧登高百戶
管臣劉承恩申得宣馬負圖定遼後衛指揮掌
印王志學管局捕殷鑒都指揮李登指揮費岐
傅應徵許國王寵之武杰佟良臣佟繼學查楠
佟勲王守官吳勝楚鎖世爵衛鎮撫范一恭楊
世勲何世鄉千戶王善張世魁李冠李世勲胥
大遷經魁武舉所鎮撫吳廷臣百戶張顯廉朱
世爵蔡承德潘朝承李寶姚守業孫世章汪清

程詔王三奇邵世偉陳移魯東寧衛指揮張三
畏王懋德金三品金充國王汝材王都全大節
孟安高世武王一中王交張承祖劉世忠馬永
馳吳良臣李賢李國輔許繼武崔具瞻劉世臣
金九成王寵白振王尚箴千戶白朝用全汝性
白源潔金國重武魁百戶金世奇邢道高尚錦
文禹杜春劉一卿自在州指揮王室藩王金高
一鳴郎得勝康世安吳朝慶孫世榮吳耀武羊
世周王仲堯傳宗王承宗劉添爵王國臣李應
武王仲義衛鎮撫王國訓吳景松李仁千戶王

繼王國宗李朝重修承勲王棚王三善修雲龍
王相李世金王守清王思忠康武王世金溫國
卿李朝陽蘇世巖高國忠傳調陽王策修應旗
王荊州李景淮王大節高尚賢修遇時王遷劉
世臣王樂金汝棟王進德劉鉞王貢百戶李朝
用李景陽劉承恩修祚崔捷武修世勲王訓石
國印趙國斌修國臣修朝臣王世勲李朝用宋
繼宗柴錯遲朝用于朝用趙繼宗劉仲賢郎文
昇王世臣所鎮撫王宦修朝臣王世武共二百
四十六員開報仍將定遼左衛千戶李遇陽定

遼中衛指揮白世忠徐延福李時芳杜世文康
誥章煥然白輻鎮撫楊國臣定遼前衛指揮戴
冠修承祖周世胤百戶鍾吉王世勲定遼後衛
百戶周國相汪俊東寧衛指揮王承慶李世章
王以忠王思恭王愛民韓祿修輔政王崇仁王
鳳高銓崔尚文李應龍張麟馬世武董官王承
恩李得陽許登庸白守清劉嶧高汝登王子奇
鎮撫李忠臣千戶陳世勲金承祖鎮撫高俊金
惟精百戶楊隆東李逢陽桂聯芳金大章劉祖
武金大遷季伏文朝相李開先千戶馮世武劉

承恩百戶孫接武王寵爵高國相溫朝相高雲
臣楊承宗李遇春周官千戶王三重李承緒百
戶劉添拱戴朝勲溫承祖王坤劉承恩董用威
高珍高尚德金大器金可鎔劉萬芳李學李承
祖金大臣葛繼祖熊璞自在州指揮李學文王
淮張鳳翼王惟重共八十四員遺漏未開中軍
張棟亦將營操千把總管隊官定遼中衛都指
揮馬次乾指揮李承恩崇添貴鎮撫宋賢鄭印
千戶徐繼先定遼前衛指揮文世勲王朝賓千
戶趙登李捷文百戶敎承恩張大經何都劉世

爵劉國臣定遼後衛千戶何時忠錢國弼百戶
張世臣張楫黃得時東寧衛指揮石金鎮撫金
應詔千戶邊永捷劉承光金文羔金奉來閔堯
節康時雍佟世祿佟漢傳明鍾世爵佟良臣李
仲堯張書紳戎世臣康偉朴時忠董鳳得金承
爵姚承恩金大朝余繼文百戶李景淮康國忠
朴臣黃丙金勇白勝李承道王大倫金仲羽梁
汝材李漢李國忠韓尚文佟縉烈李承勳白耀
武金國寵蔡詔金寵田耕白雲龍楊臻李國臣
商賢高良臣周世爵王國臣李景松曹文美白

良輔馬應奎蕭詔孫伯通修暹馬朝用高守連
吳世盤劉國印張尚信李錯高應選劉世忠曹
守訓董勲李文奎王勲崔世臣金登金體固朴
繼勲羅尚賢洪繼文于大臣申大恩金仲武李
昇共九十九員遺漏未開續蒙行查然後盡數
報出各查明呈覆本道叅看得衛官李遇時李
遇陽等營官馬次乾等射而避射者明係有違
制書其各衛掌印指揮孫一本石汝器康世雍王志
學宋繼殷自在州知州賀國定中軍官張棟應
報而漏報者各爲隱蔽僚屬俱屬違玩法應叅

究緣李過時等俱軍職賀國定係五品文職本
道未敢擅議等因先後呈詳到臣照得世冑材
官有事在射防邊禦寇尤所必資未有不服習
於平時而能効力於臨事者邇來蹶張廢業統
袴倫安懶慢相成武事不兢故臣閱歷所至必
遵

令甲當場角射而賞罰之且受事之初業已通行
條約布侯之修廣則皆一丈二尺遠近則不過
八十步之間固非慢令致期亦未苦以難事若
遼東逼隣虜穴出入必挾持弓矢人人爲兵諸

營衛官宜無不可以執弓者况當合校之時正
庶職程能之會不虞曠廢畏避其衆若此有事
將奚賴焉今據各道查叅前來除副總兵楊騰
新任未久叅將郭承恩細過可原姑免叅論外
叅照遼東都指揮使司掌印署都指揮僉事陳
言管屯署都指揮僉事蘇承勲管局署都指揮
僉事田永初分閫之虛名忘入殼之常職當比
耦而預計削名抗違已甚正披堅而登時託疾
欺罔益滋謀出三人罪當一律各衛掌印定遼
左衛納級指揮僉事孫一本定遼中衛指揮僉

事石汝器定遼前衛指揮使康世雍定遼後衛
納級指揮僉事王志學東寧衛指揮僉事宋繼
殷自在州知州賀國定副總兵營中軍海州衛
武舉署副千戶張棟任部伍之作奸法踈鈴束
恣庶僚之脫籍弊敢通同臨比而避匿者二百
有餘發覺而續報者三分之一豈惟濟惡亦復
舞文定遼左等衛指揮等官李遇時等三百三
十員營操官指揮馬次乾等九十九員義州等
衛千戶孫彪等六員習于玩愒居常已廢操弧
敢于恣睢臨閱復多失伍繩規久弛養養徒糜

廣寧後屯衛武舉者所鎮撫卓天衢一軍重造
於兩部錯置虛名尺籍莫効于寸長豈堪實用
以上各官俱應提問內衛官李遇時等事干人
衆其年老衰弱者應革去俸職行令襲替中有
貧乏不能自濟者應爲分別戒飭難槩論贖營
官馬次乾等束伍從征自廢騎射其罪尤甚仍
應以軍法治之伏乞

勅下本部覆議卽行該鎮巡撫衙門通行提問分別
懲治庶使人心知警武備漸修受甲皆可以卽
戎而控弦亦足以禦虜矣緣係查叅軍職官員

事理未敢擅便爲此具本專差千戶錢佩親齎
謹題請

旨

舉劾兵備官員疏

題爲欽遵

勅諭舉劾兵備官員事臣爲邊務至重各有司存提
衡則督撫諸臣分部則兵備各道臣欽奉

勅諭閱視節遼保定邊務凡有地方責任官員

許臣一併稽查賢否分別舉劾臣欽遵惟謹其於各
道尤加意焉卽今復

命屆期謹疏其狀該臣查訪得整飭密雲兵備副使
王一鶚器識閎深聲華峻茂年少老成事愈練
而心愈下功高勞苦官愈淹而氣愈揚發侵漁
以張吏治筦庫澄清通飛輓以足軍儲轅門超
距撫馭互有恩威倬矣平康正直查盤一無枉
撓較然惇大精明留滯多年艱危累任一方保
障三輔擅場整飭易州兵備副使高文薦清苑
循良長沙卓異入境而民知怙恃籌邊而積底
修明執公儲以資繕守獨折衆言恤里甲而覈
丁糧著爲成籍相度劑量一面之臺垣有如戊

削勞來勸相三軍之奇鍾無復怨咨繕營操之
甲仗行伍維新節閱視之供需州閭不擾名高
陳臬績著嚴關分守遼海東寧道兼理邊備副
使兼叅議李鶚魁梧之貌樸茂之材戒前車之
狼籍一介必矜繩下屬之恣睢三尺不假令嚴
而民易俗用節而士歸心近始加銜尚需久任
遼東苑馬寺卿兼僉事朱奎官曹拓落吏事安
詳興一方之廢政復見漢官威儀守萬里之遐
荒不問家人生業釐影射而祛馬政之奸林林
在牧禁逋逃而建海防之議鑿鑿可行官拙而

政則工志堅而節自勵整飭寧前兵備僉事李
松自昔不畏彊梁迄今備嘗險阻騎射兼長每
當鋒而禦寇臺垣竝起親按塞以巡工皎皎乎
貞孤之節不媿四知恢恢乎出衆之材獨當一
面精練尚需歲月保釐可寄封疆以上諸臣資
深績著邊務多裨應遵

勅諭薦揚所當照例陞賞者也整飭永平兵備陞任
副使孫應元邊才老于職方軍政嚴于司直作
鑒東隅一飯不忘鉅鹿坐收外險羣工畢備盧
龍節軍興之財用細入毫芒覘諜報之虜情洞

知曲折頃已論功陞級適當考課轉官吏治最精監司名稱整飭薊州兵備陞任副使徐學古名高洛下政擅川東指麾則事集一呼顧盼則才當八面發積羨以給合練之兵芻糧自足急程期以赴偏師之捷倖馘相仍雖已陞級酬功亦復循資陞任其勞具在當志不忘整飭開原兵備陞任叅議王之弼志已出羣氣方用壯疋馬臨邊作長城無論萬雉單車見虜馴異類有若羣羊時而戰時而守諸將竝受其機宜或以勸或以懲三軍悉遵其約束徙之重鎮允愜輿

情以上諸臣雖已陞任例應併薦所當量行賞
賚者也至如整飭井陘兵備副使劉世昌資滯
積薪風行偃草履任而會逢閱視各適得夫區
畫之宜整飭昌平兵備僉事張廷弼直心從事
節用愛人程材則足賴旬宣不當局以軍旅之
任遼東行太僕寺少卿朱應時守文爾雅分巡
遼海東寧道僉事賀溱執法不阿吏道俱有可
觀邊工已經另敘整飭天津兵備副使楊樞整
飭霸州兵備副使朱守約整飭大名兵備副使
毛汝賢入其境具聞賢聲詰所司不隸邊務于

內樞有事查閱已經別錄勤勞臣欽遵

勅諭悉爲區分恪守科條未敢併薦又該臣查訪得
原任整飭薊州兵備叅政楊錦色厲內荏言清
行濁弄機權恒憑城社攘聲利如禦國門旣發
官庫以糴軍糧復照部例而扣商價糴則四分
一斗扣則一石八錢利籠駟騶豈惟市井之尤
金沒贖刑寔則公家之盜戕善類有若豺狼每
居下而訕上遇屬官無分猫鼠恒屈已以干人
武職漫無臧否陞任則獎勵通行家私各有等
差臨行而酬謝如數指揮楊添極下吏武夫何

故先之以刺謁提調袁承芳中軍廝役何故引
之爲密交窮追紙贖卽儒生之沽酒者不遺闢
入香錢卽村社之賽神者畢及雖逆節徵於匿
喪業已褫之顯秩而惡聲聞諸載道尚當錮其
終身之一臣者應遵

勅諭追論者也伏乞

勅下該部覆議如果臣言不謬將王一鶚等量議陞
賞孫應元等量加賞賚楊錦罷斥永不敘用庶
幾舉錯大公勸懲曲當官常愈勵武備益修矣
舉劾有司官員疏

題爲欽遵

勅諭舉劾有司官員事臣惟一切邊務將士職之而有司疆理地方均有責任頃者

遣臣閱視薊遼保定邊務

勅臣一併稽查賢否分別舉劾是爲文武竝用勸懲互行安懷遠猷端在此矣臣當還

報請按其實而殿最之該臣查訪得永平府知府辛應乾守已以正近人而忠餉邊已得士心領郡益彰民譽增倉廩恃芻糧預備無患革吏胥清案牘明作有功分部勿移羣情共仰保定府知

府劉泮老成練事英敏通方應車馬交馳之會
綽綽有餘蒞軍民雜處之區欣欣無間定解官
之輪次革收戶之秤頭刑名悉出於獨斷罔不
稱平與革必協之輿情皆可經久非直股肱最
郡尤宜鎖鑰當關真定府知府武尚賢沉潛簡
重易直端方愛先節用賓旅酌豐儉之宜利在
革奸吏胥嚴出入之禁市肆不聞官價獄辭務
盡民情譽浹扶風政成指日永平府同知陳王
道魁然有儀確然有守按籍勾稽逋卒相從復
伍持衡聽斷寃民咸願質成佐郡著於灤東閱

塞勤於遼左保定府管紫荆關同知張燭躬行
周慎心計優長修邊治水議定而事事成章均
地編徭法行而人人得所署邑則心勞撫字閱
邊則費省供輸真定府同知魏學思器惟惇大
政復勵精明刑發羅織之奸解伍杜株連之害
署郡事則兢兢于出納度臺工則汲汲於經營
真定府推官虞懷忠純粹清和廉勤公謹法若
懸衡鞠讞更爲明慎事如迎刃稽查每極精詳
釋張萬臣於獄底肺石無冤翦陳仲孝於市中
口碑有頌燕南照乘冀北空羣保定府推官劉

奮庸修姱之節由守而安經緯之才由精而密
入市而先平官估下車而首辟神奸五詞明聽
平反無用深文四境周咨臧否有如洞見郅理
可當長孺家聲不愧元方易州知州石繼節昔
以避親改邑因而進秩居州共嗟偶爾陸沉復
見巋然山立日用悉裁里甲秋防加謹邊關政
惟敦樸孳孳務在宜民節可茹荼皎皎若將浼
已冀州知州姚純臣其廉不劇其節可貞躬自
勵而裁冗費民賴息肩日不遑而急程書吏皆
斂手發粟以助耕者七千餘石履畝而正籍者

一千餘家三事克修四民允賴定州知州韓希
龍膚敏弘才嚴凝直氣撫百衆而馭諸吏民安
若堵應四衝而當八面賓至如歸立票格以登
公費每見綱舉目張清餘銀以抵災逋無庸家
給人益捕許宗敏之巨兇州閭稱快革李大付
之羣蠹城社爲空塞邑早已知名邊隅尚需集
事通州知州張智望貌則中人居隣

上國當衝繁而色不變抗強禦而志不移止追呼
罷羈候公門無滯訟者立辨於庭中卻分例覈
夫差候人克供行者願出其境上雖豪民或以

爲不利而疲郡實賴其更張密雲縣知縣邢玠侃侃直方循循雅飭服官箴身爲律令詢民瘼心切惻癉嚴庫藏之出納積蠹悉祛籍牙稅之收支纖塵無染節省則陋居弗葺勤勞則蓐食靡寧均徭親自審編里甲不煩供應修塗伊始近縣無雙南宮縣知縣喬巖性資英邁政事精明折衣冠之橫而怙勢者歛容除刀筆之姦而舞文者削迹旬日編徭丁庸不啻燭照片言折獄囹圄徒爲罄縣三輔之良一時之選遵化縣丁憂知縣孫繼先先任衝疲發型自利繼遷煩

劇游刃無難且當入境之初適遇視師之會優
優乎芻糧各足井井乎閭伍相安三月之政已
行兩邑之聲竝起昌黎縣知縣孟秋樸茂不事
紛華暢達自得條理邑里招徠離散之版圖復
集田疇開墾荒蕪之稼穡咸登痛革徵糧耗銀
親編養馬頭役受詞不濫積穀獨多撫寧縣知
縣張尋訓質與文均名從實勝吏牘親持事每
先於奉上民情悉得政必出於田中葺城池以
保民興學校以造士屏羣奸邑無宿弊稽往牒
政有成規寧晉縣知縣安九域溫溫雅度抑抑

令儀審編重役秉公先質諸神明屏絕浮華攻
苦猶同於韋布修堤堰修橋梁惠而知政禁吏
胥禁輿阜廉以立威政善民安令行禁止寶坻
縣知縣王家相才堪剴劇力足投艱申明馬政
疲民賴其調停修築隄防比屋免於墊溺革副
里之冗役卻耗銀之多收資近三年才非百里
以上諸臣均之責任克修邊務有賴所當薦舉
者也清苑縣知縣郭四維累任已占精練一官
不憚煩勞公平而獄無冤民明決而案無留牘
操冰蘖之初心一廉自守當皇華之孔道百廢

俱興風聲已徧三關歲計無論六月且任遷三
邑俸積二年相應併薦者也臣又查訪得薊州
知州王都堂堂魁岸事事糊塗彌月以來一籌
莫展案牘滯於經時窮囚淹禁權下移於弄法
猾吏橫行風聞深指贖刑時或醉心酒德要以
薊門重地豈堪櫟社庸才遼陽通判劉煥然才
猷蹇淺心術幽深奉文而署庶官之考核之者
則以爲有故而顛倒是非具揭而訐同僚之賊
按之者則以爲無情而誣罔上下猥以大閑未
越豈云細行不矜安肅縣知縣周以庠名溢而

行渝宦成而志怠妻孥來往則長馬取銀三十金長夫取銀五十金各驛馬夫荆和劉策等可審錢糧徵收則丁糧多派三百兩工料加耗五百兩各項收頭張永剛張祿等可查官則歲造傘銀五十兩傘匠李世福等止當堂領十兩餘皆入已而四甲張濟民等攤賠市集濫收商稅百餘金庫吏孔余休等止照額解府四金餘悉交衙而六集劉行恩等知証倉廩鼓樓詳允修理銀八百兩衙門祠廟申支商稅銀五百金及查委官王資王梓張勲等監修俱係犯人王文

賢李道輝田疇等罰造侵漁殆三之二費出僅
什之三甚則田哥子因姦逼死田世平媳張氏
其事已露省祭石廷臻爲之過送一百兩遂得
含糊李兌因姦逼死葛守儒妻蘇氏其獄已成
教諭王鎬爲之過送三百金竟爲出脫匿紙價
五千而不報庫子荆桃底簿猶存納妾婦四口
以交驩則富民王守仁曲意相結忝久任而襲
取虛名又何工也當衝途而彌縫穢跡不亦幸
乎卒之的然日亡抑亦久而論定慶都縣知縣
姚宸日暮塗窮趨利有如饑渴見小欲速入官

已肆貪饕鷄初鳴而點不到大戶劉一蘭等三十四名一例納紙誠爲勞心爲利之徒示未揭而查未到種馬三百餘匹各等罰銀明係慢令致期之賊當堂而延富戶郭棟郭才張天明等以甘言則以

京師收債有急十家各借銀二十兩于內中戶朱朝賜止餽其半輒麾出不收退食而召富民趙寧王文岳祝大臣等以高會則以長男歸路無資十人各三十金先是阜隸劉進福徧至各家率招邀必至沈仲沂沈仲秀許百金而召保乘

其子行追送僅五十兩改慮而旋逮收監張驛
丞王大使憚二次之按求窺其意向揭送各五
十金肯首而卽扣工料科坐馬科大馬不移時
而囊橐已充查粉壁查燈籠無停晷而網羅畢
及任雖未久欲則無厭亟解倒懸無拘常格三
河縣陞任知縣劉黼理官事時醉時醒總城工
旋修旋壞請工料銀二千餘兩任庫子史繼旻
之那移茫無稽考給磚灰戶二十餘家任主簿
呂堯賓之侵扣漫不開防工興再歲告完者什
無二三夫派兩輸續攤者一加四五料戶侵銀

而逃甄灰不繼匠役負墻而立工食徒糜半刺
幸得轉移羣姦方始發覺其後更端復請千金
之發不假彌月已完數倍之工計其冒破不貲
宜於追論不敘以上諸臣俱爲失職于內周以
庠姚宸應照不謹例劉黼應照罷輒例俱應罷
斥姚宸歷任尚淺或姑從改教王都劉煥然應
照不及例改調均之責任不勝邊疆無補所當
論劾者也及照閱視地方官員近該各處巡按
御史相繼糾劾臣惟擇其邊務相關及顯跡可
指者論列之不敢毛舉苛求以傷

朝廷惇大之體其河間大名廣平順德各府州縣
不涉邊務臣亦不敢濫及以冒侵官踰越之嫌
伏乞

勅下該部覆議如果臣言不謬卽將辛應乾等各循
資擢用周以庠等罷斥王都等改調則文治具
舉武備益張此所謂長久之術也

舉薦承委官員疏

題爲欽遵

勅諭薦舉承委官員事項者從臣閱視在部屬則有
郎中左熙在監司則有副使楊樞王一鶚緣臣

力綿任鉅固難以辦於一人矧三人竝以材重
當時宜足以匡臣不逮然而分任其事猶必藉
羣有司蓋刻期於旦暮之間區別於數百千里
之內非此不濟諸臣冒寒暑歷不毛竭力盡能
欣欣然各以得奉

廟謨從邊事爲幸卽有狗馬心自效尺寸豈敢言勞
顧臣受

命於

廷許臣一併查舉臣雖闇於大較何敢蔽賢除密雲
副使王一鶚邊務有功已經另薦外該臣看得

本部職方清吏司郎中左熙謹厚老成溫恭雅
飭文學蜚聲於左輔吏材最課於中州褫身耿
介不繳繳以矜名慮事安詳不咕咕以喜事咨
諏壹稟於虛心庶司推誠而讓善科察悉由於
直道諸部懷惠而畏威省供億則兼味不入庖
厨慎關防則重門自持局鑰

國計之盈虛執籌悉數邊關之僻遠按轡周行閭
外賈生禁中方叔天津兵備副使楊樞誠與才
合名與行孚定見定守斷斷乎無他腸實事實
心恢恢乎有餘地昔按事於漢中足稱骨鯁繼

核儲於隴右不與毫釐海運建萬世之利抵掌
輒得便宜邊務閱三時之勞蒿目務窮利弊分
部而刻日閱兵一眄無遺奚翅數十萬之衆主
計而因兵定餉一成不變將爲千百年之規勞
則獨多擢宜不次臣又查訪得河間府巡捕同
知李學禮清貞寡欲博雅多聞閱歷旣久賡理
旁通砥礪益嚴廉隅卓立治盜先窮窩主巡鹽
畢發奸商邊垣障塞無分寒暑險夷士馬芻糧
悉得強弱虛實允宜優叙無待晚收本府清軍
同知洪濟遠風聲清越年力富強循良而邑有

去思明敏而郡無留事清勻不擾于閭閻廉而
且靜綜核必求其徑竇察而不苛三輔無倫事
城有待魏縣知縣李國觀孝友成家忠貞許國
追呼止料量平自爾催科居最保甲行鄉約舉
翻然謠俗還淳興學校以振士風修隄防以弭
民患查閱徧於三關大裨邊計操持嚴於一介
迥異時流長垣縣知縣胡宥愷悌存心廉明立
政里甲供需額外之私賠者悉裁其費錢糧追
納民間之私攬者莫售其奸禁游民懲滑吏一
時弊絕風清均田賦葺學宮四境敎行政舉績

成卓異選待清華固安縣知縣李宜春有猷有爲無惡無射清庫藏以防乾沒均丁糧以便征輸獄得平反釋無辜者數十命則趙灼李元等肉骨更生法行近習繩不逞者三十人則蘇臣王道等駢首就死治

畿內而執法不阿足徵強項自公餘而籌邊有議尤見經心志在遠圖才堪大受大城縣知縣忽鳴立志高明持身狷介獨行負俗苦節忘家累餼糧以餉出入守厲羔羊蠲租稅以輯流亡歌興鴻鴈覈七校之租庸奉公而不畏彊禦閱連

城之雉堞衝暑而不憚炎蒸以上諸臣均之承
委有勞閱邊無擾相應薦舉者也伏乞

勅下該部覆議如果臣言不謬卽將左熙楊樞及李
學禮等量材擢用則官材辨吏治興而勞者益
知勸矣

太函集卷之九十五

新都汪道昆伯玉著

書牘二十五首

與孫太史

次公以承家宿學高跼于天祿石渠之間其于文章
若清廟明堂金聲玉振視不肖所爲瓦缶鳴耳日
奉教于我師夫子推而納諸作者之途不肖非其人
也次公亦以狂見擇使得以盡言而無誅顧鱗火末
光不傳于日其明滅異也頃辱邸中供具僅得接席
數言累足而歸有懷不盡會長公問至發箴得次公

書露盥讀之汗滂滂下公所推轂者非不肖所敢知也夫爲文不則古昔猶之御者不範馳驅卽獲禽多君子所鄙無法故也然而游言多和法言寡和雖王良善遇不能不改節于賤工信而好古是爲難耳所願者惟執轡康衢鑾和中度使李王諸君子夾轂而趣此次公今日事也不肖方以案牘亂心日跼跼在牛馬走中息踵不暇惡敢望屬車之后塵哉從計吏還楚馬上著論七篇大要皆都中語辱公徵命謹私布之不肖材不逮桓譚願聞太玄之眇論惟高明幸察

寄劉職方

舍中幸得兄事足下乃足下亦怡怡然弟之僕領襄陽則足下得請行矣僕在楚且久卒不能發咫尺書問起居僕之罪卽百口何辭襄陽蓋四通八達之區車轂相擊僕執手板日在牛馬走中忽不自知其歲至而日遷也昔屬司馬無能指畫卽今勞苦什倍僕竊安之乃其初心猶將樹尺寸功庶幾一當漢吏顧今所夙夜者乃三老亭長事耳乃若破拘攣而流豈第此惟有道之士僕則安能足下家食有年坐籌當世之務熟矣願及今向用四海之內且得安枕春秋

名實將焉避之比視司馬籍中同游僅有存者其間
升沉聚散昏旦不齊懷昔撫今不任於邑盧希稷博
聞強識乃從吏議移官頃得希稷書則謂市虎成于
同舍使其言信孰爲臧氏子哉人心不同一至于此
顧未得聞其詳耳會部使者請代僕從諸吏送之出
疆將操舟而求足下于鄂渚間屬有疆事不得久留
境外謹以竿牘通問惟閣人可否之篋中得著論七
篇詩若干首爲二策其一則從郡吏上計乃于都市
得之其一則郡中語也吏事亂心何敢復議文墨篋
中所載徒市囂耳顧素奉敎于長者柰何以闊絕故

而護已之短哉倘以臭味相近願持三尺而定其是非幸也頃年足下所著書必且藏之名岳矣卽僕非桓譚者等願乞太玄觀之郎君雅有貴徵今在外傳必多奇異僕所喜聞敢以爲請卽次艸艸不盡欲言

汪憲副南華先生

計吏猶及見都門車馬喜不自勝比來得家大人書聞覲省狀甚具且聞六月始駕今則下車久矣執憲尊秩兼之豫章善地視昔郎署其適可知且以汪明府在郡聲迹相聞亦一快事也傳聞南北水旱杞人竊以爲憂叔亦以爲過計否也一考之期不啻過半

蓐食而操事率皆不終夕之計無補民生要其歸則牽引于物役制縛于文法拘攣于俗調之所爲也假令得博一考其可稱載者謂何始爲邑不效旣而爲郡復不效過此以往莫能逆觀生平自憾者其將何以補闕耶茲遣蒼頭歸寧附此私布朝罷乘傳而出馬上著論數篇言雖不馴願就正于有道頃以家叔徵材木于楚從方水部得之茲屬蒼頭載歸已給舟至彭蠡達于祁門願徼惠于下吏不識可否杪秋薄寒勉矣自愛

王明府

昔在丙午吾邑中同籍者七人昆猶糠粃乃獨先出
已而方民部出已而程水部出已而程考功出蓋十
有二年公出矣良工不示人以朴豈不然哉吾鄉人
推少文然負直節多感激獨狹中盛氣人故求多焉
吳人外華一見輒令人喜然徒便給多智難與久要
公當東游收吳之華而操之以鄉人之質直此所謂
彬彬者也乃今藏器有年舉而進之于宗廟社稷
之上茲所謂國器豈徒爲鄉人觀美使同籍之士目
愉而心悅乎哉俗吏厭事往往不能作闕下書非
敢侮慢自高其䟽節蓋天性也茲屬蒼頭檢視舊案

附此私布之若公之取顯名則凡在知交者皆得稱賀故不具論

盧希稷

往者舍中偶語謂公獨行負俗將不得久留內信然哉始聞公移官則以爲羣小之所嫁禍言者衆多而過聽之公遂以微罪行矣乃今拜命之辱又譖市虎成于吾黨此其故非不肖之所敢知然古之救臣卒沮于讒而不見察公爲法受過不旋踵而徙官亦惟順受之而已公孫善仕長孺令名二者不可得兼理固然也昔在郎署不肖獨守木舌乃其口刻有寥寥

之志幸得一日在事願持一七效之於時方內齊外
榮久之不發卽越人且不藥願乞不肖之軀幸得南
臥卽境內安堵 上不加誅此藏身之善術也公其
謂何江使君吾鄉聞人負耿介之節同官競爽非庶
邦之所希覲者哉頃得公所爲文若干篇受之三復
鏗然若歌肆夏而鳴佩玉旣而納策與太公所載者
並藏之不肖志在修辭累年不得尺寸又往往以吏
事見奪遂絕迹于作者之門譬之以臣虜而冕衣裳
非其所習天固將三褫之矣頃從計吏還郡馬上著
論數百言辱公先施願以爲報卽燕石不仇非所論

也夫樹穀不熟不如樹稗貴其有成耳乃若不朽之言非莢稗比願公勉之江使君有山人兄亦善文事吾鄉且在鄰國公能發一介致之相與定是非乎頃合騷選爲一部將爲學者先驅雖梓人無良願因紹介以進楚產惟襄扇最惡其賈三倍于吾鄉茲奏其三欲公知其虛得名耳屬內人多病心戚戚不自安秉燭作書不盡覲縷

游中丞

公持憲令下吏安得上書自辰陽及郢中拜命之再此下交之盛節也辱公督過復以書不及憲府爲嫌

下吏受公之知徒修廉隅近得過公之左右此誠下吏之罪然非公莫敢進此言也鄢郢相去不二百里方舟而下旦暮且至頃爲辰人所誑謂公將以六月入郢都遂䟽候人不能出疆請見嚶嚶終無已也藁陽簿以勤事死業已關說如故事賻之茲廣公之仁當倍其賦茲將戒塗矣比聞海上多事恐非督府稅駕之秋乃今楊司馬移鎮薊門代司馬者必督府也今之稱兵如求鼎實染指而得異味遂恐執熱乃就他所而濯之以故出否者什一而復餽者什三志不在鼎也公復米多于捷徑者非以其蠖屈而伸乎昆

嘗讀河間傳竊謂貞女以金夫而改節失其本心乃
今知其非然也夫擁面而出待聘而行女德之經無
以易此使治容而深藏直將爲悅已者地耳及其遇
合鮮不以身殉之河間不足擿也自京師還郡著論
七篇大都馬上之談願就正于有道治郡三年之期
今已過半日計有餘歲計不足徒取辦文法非豈第
所流也昔爲邑有遺恨今且不免謂之何哉閉閣自
思率以客氣臨民鮮和平之福德若古人所謂溫溫
則瞑眩之藥也公往往以進道相勉併私布之

程使君汝懋

兄自光化賜書厲弟出境書發則兄出間道久矣旣而得伯母函問分戚可知會無賴子自襄陽歸新安弟亦具書因之紹介彼以不滿所欲併持家報驅而之他復得家大人書乃始知耳兄不以下吏見薄惠然授書弟卒不能發一僕夫供以屏屨罪也及兄當大事復多䟽節罪狀何可勝言然此苦爲無賴者所悞耳兄能諒之乎襄有樊城鄉人多糊口者弟初至自以往年爲邑有心絕物固多啾啾今則折節而降辭色一以無心遇之詎謂輕薄子橫行市中多所睚眦於是治其甚者其餘絕不與通此輩受挫而歸喙

長三尺於弟無罪付之一笑而已邇來期當考課當
路沮不得行部檄取冊給由故事當得恩典于弟幸
甚少年躁進今始知非耳時南北暴師海內多事此
中得遠金革遲我歲月心甚安然顧境內水災民多
溝壑胼手胝足救死不遑屬 帝子分封且任大役
政非催科而拙心非撫字而勞日跋跋牛馬走中猶
未知息肩所耳兄赴闕之期或在三冬斯時弟又當
從計吏往矣相見遠近尚未可知茲遣監子歸寧附
此以謝不敏高明亮之

吳峻伯先生

頃我師拜山東之詔昆得侍函文喋喋然以卑議奏
之師不以爲狂寘之行李適聞六部之士莫不循循
鄒嶧鄉射以還庶幾僅覩彼之相顧而化豈徒鼓篋
夏楚爲哉今之善仕者速如乘傳而儒宗要秩則人
人趣之師獨愆期疏三上而不調蓋天加意鄒魯必
俟久而教成不然何可以三年淹也昆在郡亦當給
由不滿者三月耳顧吏治蕪穢無足以當公乃若絕
迹都門一書不達庶幾不失師之家法師惓惓致意
至以天意祝之昆何敢當徒顏汗而已朝回屬外姪
吳生寓書會將命者有變書復不達而龔公之寓書

竟屬沉沒則舍人無賴者之爲也頃來將載書幣爲
先大父乞師不朽之言使三發而不行謂師且轉官
不能專達不意勤師之使至楚也海岱著述穆如清
風視昔之卒業者更爲殊絕考錄則瑰琦盈背而壹
稟之正經鄒魯之于文學蓋其性然揭旗鼓而左右
之賴我師在也乃知昔之所聞者章章較著而我師
之所愉快者固在此不在彼矣具草若干篇附使者
進屬按部及督學守巡諸公在郡對使草率不盡欲
言

又

皖城卽次天假良覲倅人夜發恨不能以不肖之軀
送之詰朝以詩二章托郵人馳上不識能專達否季
秋朔日始得歸覲聞盜起信州且趨建寧次且戒塗
尚未能發乃從廣濟使者得師手札及楚薦書露盟
讀竟喜可知已聞江西羣盜尚復縱橫第恐中國多
故杞人之憂終無已也海翁書札已專致之且得報
書歸之使者十月上旬輕裝就道入閩後當發使專
訊起居行間所上詩恐終不達謹再錄求正伏惟台
鑒書不盡言

又

項因信使獻狀情事縷縷具在狀中仰藉寵靈不踰
月而拜 新命躡等驟進豈始願所及哉竊惟受教
於夫子而事 君受命於 君而領事共而勿貳義
不避難猶之問耕則耕問織則織惟所命之耳獨以
情深帖吧望切庭闈烏烏私情何繇自遂此則明發
之有懷者也閩寇殲盡材官始得息肩然而虜情不
可以豫謀軍餉不可以復請客兵不可以遽罷常賦
不可以取盈即使法如司馬算如弘羊難與卻慮無
論其他矣夫子加意門徒畱心 國事其何以爲閩
人地邪季公有事澤宮卽欲修問會聞老母有疾令

人恍然若亡其精近報疾平始克事事季公賢聲藉甚無勞東顧之憂夫子越在要荒積有歲月行且置身臺省持議廟堂不待龜策而知矣索居炎徼得無太苦否乎歲編刻成願受卒業猥辱寵命幸自託於無能之辭發使西征神與俱去伏惟高明照察不盡言

又

頃受疆事露衣蓐食於戎馬之間絕行李廢起居三年往矣精神不逮禮法愈疎及夫子蒞豫章遷貴竹聲迹孔邇而一介終不及門名教罪人擢髮未可悉

數比年拜命之再知夫子加意惓惓卽有曾無心寧不感服黔陽使至承教疊疊百言大者則以次公見倍頃刻未嘗忘於懷次者則以黔事因循將欲興起乎吏治次則憫奚仲明之死節將率諸弟子從而表章之此固孝友忠貞之大端恩義兼盡者之盛節也時政日新吏道丕變卽得一節之士當道務推轂之不遑安得立置夫子於三事之端揖讓而修太平之業也季公居建寧宛然夫子家法部中首出而民譽同歸愛莫助之固非虛語閩事幾不可支賴宗廟社稷之靈幸而不失其版籍某所謂因人成事何敢

言功今冒然而進二階顏一何厚願得策名執憲而
猶待罪戎行以章甫而授越人非被髮者之所習也
且老親家食數以用武爲憂使人源源而來獨督促
爲歸田計直以命在軍旅不致朝受而夕棄之茲幸
海波不揚疆場無故假以旬月願修一日之養以當
三公不識能從所欲乎否也承示歲編汲汲然欲見
全簡吾師之所論著何事太玄某材不逮侯芭而嚮
往過之矣執筆之役又惡敢辭第清廟明堂而使廝
養當戶懼爲觀者病耳黔使入閩舟行有厄幾不能
達屬其反命敬私布之荒服炎風願爲國家加愛

不盡言

又

今以閔事授不肖豈其才力足任哉 聖天子欲遂
行者之高無論居者之拙不肖自知不任明矣夫子
發重問之使加之以溢美之詞拜而誦之頊頊然無
所措手足何者卽不勝任昔徒爲名教辱今復爲名
言辱也昔人謂孔子鑄顏子蓋振古莖莖焉夫子置
不肖於鑪錘之間徒取名物衣冠則亦庶幾乎近似
要以功實不啻若萬里之相懸又惡知相逼也徂秋
紹介黔陽私布悃閔事具在前疏茲不具陳秋後

歲事大穰兵端稍輯無亦支離之德天獨全之不然
何所逃罪歲編始得卒業如聞罄歎之音將繫末簡
數言以附不朽歲杪多事日力不遑自今當勉圖之
不敢廢命俟吳邵武還郡當屬彼程督梓人晉江莊
先生不肖雅重其氣節往游公在事纏纏稱之不休
不肖獨未及行部彼中恨相見晚耳茲拜明教敢不
祇承使者至卽值歲卑畱之更歲而後發不肖修訊
於莊先生者則先使者行矣時當明盛惟夫子對時
茂育以保社稷民人其無任瞻仰之至

又

履端屬使者反命謹具書紹介進之日月不居炎風
駸駸至矣道里隔閼久曠起居閩中仰藉寵靈疆事
稍息先是當事諸君子日事戎行至若要束吏民率
不遑暇此時稍稍爲之條理大都沿襲舊染不啻浹
膚告詔雖煩卒難遽革要亦躬化多闕謂吏民何老
親懼涉畏塗自甘家食某進不能興一方之治退不
能釋二人之懷每一念至頃頃然若無所容頃辱放
言不敢復有所引避惟計日龜勉望雲歔歔而已序
藁尚未畢役罪狀何可勝言顧幾欲爲六師鴈行往
往蜷局不進何者難乎爲前也會季公使人行附此

私布炎方幸自愛不盡言

東圃鎮國

昔以狂簡居郡王公往往折節下之乃若相與綢繆
宜莫如殿下去郡五稔未嘗一日忘舊游而相念之
深亦莫如殿下自林經歷行後閩事幾不可爲賴
宗廟社稷之靈始得因人成事項承節鉞之命誠自
知其不堪竊計殿下聞之亦且爲某作苦矣汪生持
書自國中至纚纚皆肺腑之言手誦再三幾而泣下
比年露衣蓐食勞苦萬端時而隱几時而枕戈驩然
浮白高堂歌舞進退遽然覺猶在矢石之下烽火

之間嗟乎麋鹿常聚鳴鳥相求生人之情各有所急
徒以羈縻祿位隔閼封疆遂乃捐石交遺樂事卽跂
行卵化不猶賢乎越在南溟飄風萬里獨不能自致
扶搖之上搏江漢而下之憾也部中少年幸俱無恙
今所供奉必多新聲倘然戀戀故人無忘下里則雅
歌一闕庶乎想見其人高陽酒徒不改故態知殿下
不以敝帚棄之也屬汪生豎子報命私布腹心語費
意煩不能盡其什一天休滋至願言祇承幸甚

王元美

公書挾日三至纚纚然情見乎辭不佞奉而讀之忽

不自知其喜之何從也。閩海洿池耳，獨奈何擾神龍而探玄珠哉？吳山人遲遲其行，六月書始至。山人至則王從事及周泉州使者相繼至矣。是時荔枝初熟，輒欲走一介以供客羞。吳賊擁百艘自海南來，不佞方在行役，遂愆期至此。習聞次公高義，真吾所願交。驩讀公書，知次公推轂不佞者過甚甚，則置濟南公於岱嶽而登不佞於配林，卽不佞有胷無心，固知其非至言也。今之作者無如公。若濟南公以是而列時分封，作望四岳則可矣。俯視不佞，曾不能以部婁惡得與配林齒。不佞幼負迂遠之癖，往往以吏事故不

得從諸作者游乃今猶在戎馬間何敢復議文墨顧
於公家伯仲獨嚮往勤勤無亦里耳期於陽春肉眼
期於國色此心終不能忘耳承示十六絕句不佞首
被溢美之詞行將掄揚下里物色後陳與其潔已而
進之也離薺園詩少暇當具藁就正佛像無宿構者
頃已屬之良工近刻佛氏四經俟像完當併獻戚將
軍當代名將翩翩有國士風所著新書茲欲爲之傳
布不佞將徼惠於作者公許之乎頃從明卿得濟南
公白雪樓集投戈所至日與之俱生則同時居則異
地盖有幸不幸耳吳山人謂公所論著業已成編願

奏薄力於梓人竊自附於不朽厚在莫逆母令楚子
惠美於濟南外勒狀上次公願因紹介以入

王敬美

昔吳門陸氏並起學士至今誦之當此時去古不遠
藉令超乘而上庶幾乎復古不難彼率沿於波流卒
未登於彼岸遂令嚶嚶之士或以此求多焉 明興
以來去古遠而復古難矣獨李獻吉建招搖而齊步
伐徐昌穀亦自吳起趙趙然卷甲從之 今上時則
公家長公若于麟部署海內文事足下以吳門年少
遂驟乘於二君子之間異日畢力齊驅陸氏猶將避

舍何事昌穀僕幸以通籍得習長公乃今猶在牛馬
走中恨見足下晚耳僕起家艸野未嘗習先世之業
游大人之門比入官復依依不能去日所事事非錢
穀刑獄則土地甲兵其於就業何有疇昔之志一切
棄而不談誠知秉羽先登固非吾事長公謂僕足下
獨多僕而亟稱之昔安平君用兵如神顧乃置卒上
坐而繆爲恭敬足下盖用此也昔人以遲暮力學亦
往往成名僕幸得弛於負擔當治任公釣具以從伯
仲竊計垂老之日皆受教之年足下柰何距僕也家
弟貴迂狂類僕獨病孱弱不欲強之讀書每聞人人

稱足下名輒赧然面熱芝蘭蕭艾其叢生較異寧詎
同乎備在通家遂緩頰至此高明幸無督過何敢復
言

胡少保

頃上計都門乃爲李婺州作說客我翁不以此督過
誠能察其無他腸耳比來 帝眷日優渥而我翁之
爵位日益高數千里內枹鼓不聞勲名日益起矣我
國家有社稷臣者三肅愍于公新建王公其一則公
也肅愍功高或猶病其明哲宸濠發難不啻見戲新
建往往以論兵顯則其人足稱乎往者東夷苦海上

諸郡視匈奴加焉露衆暴師 天子且宵衣矣日易
將兵者月易將將者卒未嘗有尺寸功我翁馬首始
東則以直指使者往也自督府之詔且下羣酋駢首
就縛數千里內枹鼓不聞此所謂天授非人力也卽
使二公而在猶當雁行而兄事之新安文獻不謂無
徵千載以來我翁擅場爲山川增重多矣下吏心切
向往如渴如飢官守一隅顧不曳裾轅門供掃除役
茲屬堅子歸省且以家叔東行敬奉書私布藉令不
肖有天幸將執手版待命聞人區區下情庶幾得堦
下一吐耳唐突威福不盡欲言

又

翁之再造吳越蓋人人知之乃若遣將援閩使閩人不失其土宇秋毫皆翁之賜也此之爲烈某僅見其一問問之閩人人未必知也嗟乎不知然後爲至德翁之謂乎某末學腐儒幸而因人成事使山可負豈蚊之能竊位踰年露衣蓐食日不遑暇惴惴然惟懼付託不效大傷推轂者之初心也戚將軍奉翁約法卽島夷至者無能出其彀中假以數年外侮可絕獨海南州竊出沒無時賊首吳平方擁衆北犯戚將軍又且汗馬從之矣從許君拜命之辱媿汗霑衣許君

謁行某方有事行役草草申布不盡下情山似洛陽人似司馬不自意於吾鄉見之異日弛於負擔願供杖屨之役唯翁幸察

陳達甫

辱徵芻蕘僕將索之行李顧車馬頗敝莫能構一辭遂令失長者之期且有諾責渡淮始能屬艸就舍輒出示方定之云者數以挾策爲難不果持去徵君以才富傾郡而鄉曲小子乃欲侘室家之好擬議其紛華顧不能履其閭中徒空語耳恐徵君以然諾督過謹治狀介紹使君奏之遲之數年或得循牆而進倚

戶而立當操觚而更筆削尚庶幾哉都下接廣陵朱
君稍得聞其緒論辟之蛾眉姣服薌澤紛然宜見之
者目挑心愉矣借使沉水落川要之自有天然者安
事冶容耶今之談藝者以唐爲宮此值離宮耳要之
未央長樂有漢魏在不識處守者以爲然乎行之日
幸公步趾贈言情義深厚則固已著於心不具論之
今臆見如此

又

自不肯入閩汗衣蓐食五年于外其間艱難險阻每
欲對公抵掌盡之公固食霞人也竊計腥膻之口公

所厭聞比受公餽歌五章黃岳八什乃知公未嘗弃
不肖非以其臭味同哉不肖自束髮入官四方之事
皆分內事顧譚不任烹錘不任割其材則殊乃今委
質鑪錘之間何敢躍冶雖努力從事謂不任何其少
侍諸長老游儼然責不肖以經世之業竊自意幸不
式事猶得自比于瓦缶鉛刀顧待罪行間弊弊焉心
與髮俱短矣三家之市無千金之子固非虛言今之
作者如林大都鮮專壹之效懸書而出謹然鼓行當
時猶或姍笑之其何以稽古人而楷後世公當季年
業已精而神方王龍淵牛鼎非公任哉公有子仲魚

骯髒多大節觀其所稱載恍然奪人目精蓋汾水之
精豐城之偶也吾家二弟哆口談天顧獨折節公門
而兄事仲魚謹甚兩家父子兄弟豈必婚媾而後肺
腑哉累得仲魚書屬不肖爲嗣毋宜人立傳疆場之
吏又安能文舍弟則以宿諾三年日請不肖爲之地
命燭具藁輒授豎子行誠自知其不文直爲舍弟修
已諾耳假令他日授梓願更進之新詩三章聊供坐
客行酒東帛青素二事願爲公製鶴氅謁武夷君儻
然肯來當勅玉女飯青精以待

周中丞

君相任賢甚殷臧否甚覈翁居江西甚久巡撫之政
又甚宜民 上以人言翁得賜老驛書至不知所裁
旣則以御莫如稷盡馬之力則煩射莫如養由基矜
百中之能則殆 上方佚翁以老謂非養其力以有
待邪聞翁出次信州計杪秋得代謹發部士敬問起
居不肖越在戎行未畢海南之後猶之弓敝而射者
不止馬罷而御者不休視翁此行翩翩乎千仞之上
矣往顧山人得習於翁紹介修問申以短述承翁累
投詩教不啻連城每以燕石不讐無敢爲報屬翁得
請而去終不敢護已之短而缺知已之歡賀監風流

固翁今日事也他日得賜骸骨誠願操舟候門此則其先談耳不備外具藁一章勤狀一事

胡侍御

重使自六傳來將命還報倏然暑卻盎然春生誠知不肖無能爲役乃其心則願從長者游耳四牡馳驅無論六月萬民瞻仰有若二天不肖旣不能負鞭弭以當圉人又不能具壺漿以迎司僕疏節甚矣關門獄立真氣斯來法駕雲行清塵在望不肖惟抱竿牘伺都亭望見顏色此夙心也前發材官祇謁境上爲日稍久惧涉不恭茲復屬千戶晏秋元申布道左伏

惟台照不宜

陳進士

足下三上春官乃始通籍世謂大材晚成非邪要以
待時之清見可而進則足下盖先得之無恨晚矣頃
者公車射策天祿敷言竊計足下必且擅場不假枚
卜乃足下恬然無競退然不居凡此皆盛節也夫士
之入官猶金之入冶糴鋤鐵鉞唯所命之故金躍冶
則不祥士擇官則不順舉世獨重內輕外何說哉今
之郡縣賤且勞矣賤則志不驕而可使居尊勞則氣
不惰而可使字佚何言郡縣輕也以足下之才必不

出居郡縣藉令得郡縣閑跬步而舉千里操咫尺而保兆民於足下何負足下寧以爲輕乎不佞越在海隅夢寐尚畱江漢茲從陳少史所得足下書乃知高陽酒徒猶在足下齒頰感激感激來書以爲邑爲已任故不佞喜聞而傾心道之唯足下而後可以進此言耳海外露師暴衆終歲不休不佞胼胝其間曾無益於毫末願足下操觚以當抵掌且爲不佞決筴焉備在通家遂踈禮法惟足下照納不盡

程辰州

頃自分席郡中業已五年于外雖閩楚同在南服不

啻數千里而遙當無事時猶恐不相聞問無論戎行
矣辰陽初罷督府郡事益輕茲移奔走者以爲拊循
卽民功什倍何有自上計還郡政易舉而澤易行猶
黃河之歷積石涉龍門其下有若建瓴復何擁格獨
以漸而朝宗耳高陽酒徒任放不檢不謂坐客避席
主客獨酌大斗彊授之乃今作氣歛容庶幾求免酒
過第恐氣衰力弛終於失容昔者嘗宣言於鄉大夫
前坐中毋自謂善善則大斗歸焉不醉不休也今則
蹈之殊自可笑備在肺腑柰何禁此裏言惟高明照
察不具

程水部

近聞有事治河又復爲公作苦顧齊魯文學燕趙悲
歌卽其性殊亦由地產新都之士往往用勞後起公
第安之不佞居閩有年閩事粗定適時戀主不敢
遽有他腸藉得息肩遂我初服亦倦飛之意也

太函集卷之九十五